

東

華

錄

東華錄

順治四

臣王先謙敬編

臣周澹蕃恭校

順治二年乙酉春正月乙酉朔朝鮮來貢○戊子初宣府巡撫李鑑以赤城道朱壽鏊貪酷不法將劾奏之壽鏊遣其子屬綽書泰求英親王阿濟格王與鑑印札令賞壽鏊罪及王出師至宣府召鑑面諭之曰壽鏊忠良爾宜釋免鑑曰此欽犯也若擅釋之王亦不便綽書泰叱之曰爾何不懼王而反懼冲齡 皇帝耶鑑絕然而去王復遣綽書泰總兵劉芳名強之鑑堅不允事聞下內院等衙門會鞠得實壽鏊綽書泰及綽書泰四子俱棄市竝籍其家芳名革職入旗○己丑總督河道楊方興奏山東地土荒蕪有一戶之中止存一二人十畝之田止種一二畝者儻不計口覈實一概

徵稅名爲免三分之一實以一二畝之地而納五六畝之糧荒多丁少以荒地累熟地逃丁累見丁祈將見在熟地或免一或免半其拋荒之地不論有主無主盡行蠲免俾民受實惠而後民志固民生遂矣得旨各直省無主荒地該地方官開具實數報部以憑裁酌其熟地錢糧照蠲免例如數開徵已有諭旨戶部知道○故明開封府知府李猶龍盤踞河岸繕修船艦自稱欽命河道仍用崇禎年號主事凌駟所委開封府推官王夢桂僞造關防共圖不軌豫親王多鐸統師過衛輝遣內院刑部官捕獲猶龍夢桂俱於軍前正法奏聞 上命並籍其家○辛卯賜宣府巡撫李鑑玲瓏鞍馬一匹貂裘一襲金五十兩銀千兩竝以朱壽鏊家產給之○禮部奏故明舊例凡遇萬壽節親詣奉先殿上香行禮又遣官祭陵上香燭供酒果不讀祝得旨祭 太廟如奉先殿禮儀讀祝致

祭祭 福陵 昭陵 四祖廟止上香燭供酒果不必讀祝○甲

午予殉難招撫侍郎王鰲永祭葬蔭其子樛爲錦衣衛世襲指揮
僉事○乙未宣府巡撫李鑑奏辭 欽賞以佐軍需優旨嘉獎所
實不准辭○丙申給事中朱徽奏去歲五六月間人心甫定引避
者多寮署一空班行落落及 聖主御極以來東西響應多士雲
合今西寇就擒秦楚吳越絡繹駢集仰慕 皇風咸思報效正當
恢張天紘延登俊乂乃邇者京堂等缺強半裁省人才不無壅積
之虞恐非夢卜求賢千金市駿之意也臣愚謂已裁者合行速補
毋使淪滯方來者作何擢用竝宜酌量衙門大小職務繁簡量行
增設務俾人與官稱以疏仕進之路若以官冗費多輒議裁併不
知 天子坐擁四海之供豈惜區區升斗之俸乎況年力老壯自
有乘除考績程功復分殿最儻黜陟惟明進退以禮將來正患才

少甯慮官多又普天率土義均臣民凡督撫有缺宜新舊參用以公委任至若錢糧兵馬皆大權所關太分則勢渙而難覈太合則勢重而易專故明卿寺衙門類若重複者非不知裁之爲便蓋於設官分職之中寓防微杜漸之意也夫開初之初君臣同心何所不宜至爲子孫萬世慮不得不委曲詳盡計其利而更計其害也得旨裁省京堂意爲冗員無事非因惜俸朱微此奏似屬可行著將各卿寺衙門因革事宜直據所見簡明再奏其詹事太僕尙寶等官已經暫減應否仍設著吏部會同九卿科道詳議妥確具奏○丁酉命饒餘郡王阿巴泰爲總統固山額真準塔爲左翼梅勒章京譚布爲右翼帥師往山東代肅親王豪格○山東膠州總兵官柯永盛勦靈山衛土石山賊平之○庚子以固倫公主下嫁內大臣俄齊爾桑子喇瑪思○河南孟縣渡口村至海子村河清二

日○辛丑大學士謝陞病篤乞休並請繳還賜物命內院大學士率太醫院診視許暫假調理賜物不准繳進○壬寅以災荒免上林苑監額稅三之一○癸卯少傅兼太子太傅吏部尚書建極殿大學士謝陞卒贈太傅諡清義廕一子中書舍人子祭九壇加祭七壇給全葬銀兩○乙巳吏部侍郎沈惟炳擅將故明福王所用葉廷秀左懋泰懸名授官部議論死命革職爲民○肅親王豪格奏僞睢州總兵官許定國於元年十二月以書遺臣言欲攜其子來歸請我師渡河援之臣覆書言果欲降可速遣爾子來定國遂以二年正月遣其二子至仍乞我師渡河衛其眷屬臣因未奉上命不敢渡河十五日定國又遣人來言高傑偵知彼遣子投誠遂發兵五千圍州城不能自脫亟望我師馳救臣未經奉旨不敢擅往謹此奏聞又奏尙書車爾格管翼將領葉克書帥將士攻破

滿家洞土寇十餘處復分兵以土石堙塞二百五十一洞滅之所
俘獲婦女牛馬分給行闕士卒○御史趙開心奏臣聞君子明慎
用刑而不畱獄蓋明則無冤情不畱則無滯獄當國家開勅之始
宜體上天好生之意臣見獄中桎梏之下冤苦甚多其從刑部發
監者四五日或可審結惟別衙門發送者一入獄中置之不問未
經審訊申訴無由有去故鄉百里千里者身已繫獄家罔聞知嘸
飢號寒艱苦萬狀罪未顯著命先顛隕乞敕下刑部差司官五日
一查分別何衙門所發速行審結則無辜者得生卽應罪者亦不
至淹滯矣更有請者府州縣衛亦有監倉逮繫之人冤鬱不少訊
官敲撲獄吏誅求有罪不至死而鞭撻之餘皮肉焦爛禁錮之久
家產蕩然殊可憫惻竝請敕直省撫按通飭有司除死罪重情宜
加詳審量予寬限外其餘十日卽與結案應繫者繫應釋者釋應

保者保速行發落鬱氣舒而和氣洽將見刑措可幾太平立致得旨各衙門發送人犯著分別審實卽與發落在外問刑各官有滯獄害民者該撫按參奏重處○眞定巡按衛周允奏眞定大名順德廣平四府山寨賊寇悉平○丙午命房山縣知縣歲祭金太祖世宗陵於常用祭品外加太牢一○丁未免山西本年田租之半以地方初復故也○祭酒李若琳奏請更定孔子神牌爲大成至聖文宣先師孔子報可○戊申遣參將徐應舉招撫故明總兵高傑○己酉故明衡王朱由極奏請入覲命候旨來朝○庚戌禁內務府管領等私收投充漢人冒占田宅違者論死○壬子敘定燕京破流賊及克錦州松山功將士升授有差贈陣歿總兵官金玉和等四人官子弟襲職○免濟源武陟孟溫四縣今年稅糧及磁安陽等九州縣稅糧之半○癸丑罷修邊民壯八千餘人○朝鮮

東華錄
卷四
四
來貢

二月甲寅朔守備霍然訐告宣府巡撫李鑑受賄事下法司勘問擬鑑棄市得旨李鑑曾著大功免死追賊罰俸六箇月○乙卯定國大將軍豫親王多鐸等奏大軍於元年十二月十五日追流賊李自成兵至陝州先遣前鋒參領索渾拜尹代等率二十騎前往捉生有賊將張有曾屯兵靈寶縣城外索渾等乘夜襲擊敗之二十二日師距潼關二十里立營候紅衣礮軍時賊渠李自成在西安聞信率援兵至二十九日賊將偽汝侯據山爲陣以拒我師前鋒統領努山鄂碩等率兵趨拔賊營賊兵迎戰護軍統領圖賴率騎兵百餘人直前掩殺斬獲過半二年正月初四日賊將劉芳亮領兵千餘來窺我營護軍統領圖賴阿濟格尼堪阿爾津願納代伊爾都齊敦拜杜爾德等率正黃正紅鑲白鑲紅鑲藍五旗各牛

衆護軍一名迎擊大敗之多羅貝勒尼堪拜尹圖等增兵奮擊復大敗之俘斬甚多自成聞敗親率馬步兵拒戰隨調饒黃正藍正白三旗兵協力並進盡殲其步兵賊之騎兵各奔竄初五初六夜賊又率衆連犯我營俱爲我軍擊敗初九日紅衣礮軍至十一日遂進逼潼關口賊衆鑿重壕立堅壁截我進師之路於是舉紅衣礮攻之賊衆震恐我軍相繼衝入誅斬無算其先入者穆成格俄羅塞臣也旣而賊又以騎兵三百橫衝我師爲貝勒尼堪懷順王耿仲明貝子尙善所敗賊又分兵躡我師後蒙古固山額眞恩格圖率殿後軍又敗之自成遁走西安十二日護軍統領阿濟格尼堪等領兵渡潼關濠口賊衆望風奔潰守潼關僞吳山伯馬世堯率所部七千餘衆迎降計獲馬千餘輜重甲仗無算十三日大軍入潼關察獲馬世堯遣往自成處奸細遂擒斬世堯十六日大軍

自潼關起行十八日師至西安自成自料不能當已於十三日焚

其宮室挈其子女出藍田口竄奔商州遂遣護軍統領阿爾津等

追之不及乃還○丙辰以翰林院修撰陳名夏慕義遠來擢爲吏

部左侍郎兼翰林院侍讀學士賜貂裘鞍馬○轉王公弼爲戶部

左侍郎以任濟爲戶部右侍郎

故明兵部右侍郎

○以王點爲山東右布

政使

由大同巡按遷

○丁巳九卿科道議覆給事中朱徽奏詹事府太僕

寺尙寶司宜復冗員宜裁應設詹事府正詹事一少詹事二左右

春坊庶子諭德中允各一太僕寺正卿一少卿二寺丞一尙寶司

正卿一寺丞一從之○吏部奏故明兵部尙書仇維禎年已衰老

不堪煩劇得旨仇維禎著以原官致仕仍賜貂裘一襲以示優異

○戊午給事中郝傑奏停刑減獄宜復古秋後處決之制至於廢

斥諸臣罪有可原才堪錄用者竝祈量予自新下所司議○己未

以西安大捷三秦平定 上御武英殿受朝賀○令戶部傳諭各

州縣有司凡民間房屋有爲滿洲圈占兌換他處者俱視其田產

美惡速行補給務令均平儻有瞻顧徇庇不從公速撥耽延時日

爾部察出從重處分○以李鑑爲兵部右侍郎兼右僉都御史總

督宣大馮聖兆爲右僉都御史巡撫宣府

原任山西路安府通判

○贈殉難

招撫侍郎王鰲永爲戶部尚書○刑部左侍郎党崇雅等奏三秦

小民未獲甯止請速頒恩赦以固人心至督撫爲綱紀之宗司道

乃旬宣之寄而府州縣各官撫字彫殘所繫尤重務期簡用得人

庶可廣 皇仁而布實政得旨三秦既定恩赦宜先其設官撫輯

一應善後事宜俱著該部作速覆行○給事中李士焜奏古帝王

制律輕重有倫情罪允協今者律例未定止有杖決二法重者畸

重輕者畸輕請敕部臣早定律法務期援古酌今詳明切當分別

杖流斬絞之例凡有罪者先期具奏必俟宸斷遵行則法得其平刑當其罪得旨修律官參酌滿漢條例分別輕重差等彙成一編進覽○投誠睢州總兵許定國奏擊寇高傑已用計擒斬其餘黨尙未剿除請發大軍剋日渡河以靖殘寇得旨許定國計殺高傑歸順有功知道了征南大兵不日卽至河南兵部知道○辛酉諭定國大將軍豫親王多鐸曰聞爾等破流賊於潼關遂得西安不勝嘉悅初曾密諭爾等往取南京今旣攻破流寇大業已成可將彼處事宜交與靖遠大將軍和碩英親王等爾等相機卽遵前命趨往南京大丈夫爲國建功正在此時汝其勉之其隨英親王豫親王之漢軍自固山額眞梅勒章京以下兵丁綿甲紅衣礮均分爲二著英親王豫親王各行提領若相去已遠可仍如舊至於英親王等奉命征伐乃爲己事越境至土默特鄂爾多斯部枉道

索取駝馬復轉入邊以致逗遛其罪非小特諭汝等知之見今流寇餘氛責令英親王等追剿○諭靖遠大將軍英親王阿濟格曰爾等自京起行在先定國大將軍和碩豫親王等起行在後今豫親王等已至潼關攻破流賊克取西安爾等之兵未知尙在何處此皆由爾等枉道越境過土默特鄂爾多斯地方妄行索取轉而入邊以致逗遛故也今已命豫親王恪遵前旨往定南京爾等可仍遵前旨將流寇餘孽務期剿除以贖從前逗遛之咎勿以流寇已遁西安旣平不行殄滅遽爾班師其隨英親王豫親王之漢軍自固山額真梅勒章京以下兵丁綿甲紅衣礮均分爲二著英親王豫親王各督領若相去已遠可仍如舊○御史傅景星奏民房應給旗下者當寬以限期俟其搬移始令旗下管業至於勸懲乃御世大柄毋許奸宄告訐致開誣謗之端用刑係民命攸關宜復

秋後之條以圖尙德緩刑之治若夫官方宜清而雜流未盡激汰
門市有稅而諸物日見騰縮一切制度尙宜斟酌盡善下所司速
議○壬戌給事中向玉軒奏民間墳墓有在滿洲圈占地內者許
其子孫歲時祭埽以廣 皇仁從之○甲子先是勒克德渾杜蘭
杜爾祜穆爾祜特爾祜札喀納薩弼杜嫩等以有罪廢爲庶人至
是給以品級禮部請仍入宗室籍內從之○丙寅命戶部傳諭管
莊撥什庫等凡圈占地內所有民間墳墓不許毀壞耕種所植樹
木毋得砍伐違者治罪○河道總督楊方興奏黃河爲害自古有
之去歲遭逆閹蹂躪之餘官竄夫逃無人防守伏秋水性自黃河
北岸小宋曹家口等處盡皆衝決濟甯以南廬舍田禾大半漂沒
若不乘此水勢稍涸鳩工急築恐秋水一漲勢必大潰不惟物力
倍費且恐河北一帶盡爲澤國章下戶工二部速議○戊辰御史

趙開心奏近來敕旨凡民間出痘者卽令驅逐城外四十里所以防傳染也奈所司奉行不善有身方發熱及生疥癬等瘡概行驅逐者貧苦小民移居城外無居無食遂將弱子穉女拋棄道傍殊非仰體 朝廷愛養生息之意請嗣後凡出痘之家必俟痘疹已見方令出城有男女拋棄者交該管官司嚴加責治其城外四十里東西南北各定一村令彼聚處庶不至有露宿流離之苦得旨民間男女果係真痘自當照例移出令工部擇定村落俾其聚居得所身方發熱未見痘疹者毋得輒行驅逐○己巳以祁充格爲內弘文院大學士○庚午諭禮部故明十二陵每陵遣太監二名壯丁八名看守每年令守陵太監致祭二次其太常寺及近城知縣不必遣祭○靖遠大將軍英親王阿濟格等奏大軍入邊沿途勦賊入戰皆捷屬州縣攻下者四城投降者三十八城俱已酌委

官員安撫計獲白金千兩馬三千二百九十匹駝四百六十隻有奇得旨覽王奏官軍西勦屢戰克捷平定三秦知道了該部知道○壬申故明吏部尚書傅永淳引疾乞歸溫旨慰允之○宣府巡撫李鑑以守備霍然誣訐上疏自訟命刑部會同內院覆勘得白免其罰俸○甲戌刑部尚書管左侍郎事田唯嘉卒○饒餘郡王阿巴泰奏二月初三日聞南兵渡河圍徐州沛縣李家樓隨遣固山額真準塔等領兵星夜前往賊馬步兵二千有餘屯駐徐州十五里外我兵衝擊賊營賊兵赴河死者無算擒斬逆渠六人安撫百姓秋毫無犯獲人口牛馬甚多○丁丑順天巡撫宋權奏近日換地之民離其田園別其墳墓甫種新授之田廬舍無依籽糧未備遽令按畝起課民隱堪恤請特恩蠲租一二年與民休息再查薊州地處荒殘初以大軍經過特沛洪恩蠲租一半但小民輸納

猶艱請照霸州之例一體全蠲以廣休養下部議○戊寅御史高去奢奏臺諫之設所以寄耳目之司今國運方隆庶司充列而獨令臺省班聯晨星寥落非所以廣言路也請行部曹改授之法採其聲望素著者銓補下部院酌議○庚辰直隸巡按衛周允薦故明工部尙書劉遵憲以老疾辭允之○辛巳定和碩親王多羅郡王多羅貝勒固山貝子儀仗郡王以上用五爪龍貝勒以下不許用○壬午開大同密雲二鎮鼓鑄充大同餉因王宏祚請也

三月甲申朔禮部奏三月初三日應祭 歷代帝王按故明洪武初年立廟將元世祖入廟享祀而遼金各帝不與但稽大遼則宋曾納貢大金則宋曾稱姪當日宋遼金分統南北之天下帝王廟祀似不得獨遺應將遼太祖竝功臣耶律曷魯金太祖金世宗竝功臣完顏粘沒罕完顏幹離不俱入廟享祀元世祖之有天下功

因太祖未有世祖入廟而可遣太祖者則元世祖之上仍應追崇
元太祖一位其功臣木華黎伯顏應從祀至明太祖竝功臣徐達
劉基各宜增入照次享祀以昭帝王功業之隆用彰 皇仁追崇
往哲至意從之○御史趙開心奏朝參之儀故明兩掖門外有東
西兩廊各官按品級坐立今爲逆賊焚毀每遇朝參各官坐立無
所歷位踰階起止莫定況時值春夏之交大雨時行之候羣臣斷
難露處請令工部就六科廊基址鱗次搭造俾棲止有定朝常肅
而體統嚴下所司議○乙酉以熊文舉爲吏部右侍郎由右通政遷○
辛卯免山東荒地稅糧○壬辰湖廣巡撫王夢尹引年乞休允之
○禮部奏請直省府州縣學生員應令各學選拔文行兼優者大
學二名小學一名送國子監肄業聽監臣考課仍以貢監名色彙
送應試從之○甲午增六部都察院翻譯漢字主事各一○乙未

大學士馮銓洪承疇等奏上古帝王奠安天下必以修德勤學爲首務故金世宗元世祖皆博綜典籍勤於文學至今猶稱頌不衰
皇上承太祖太宗之大統聰明天縱前代未有今滿書俱已熟習但帝王修身治人之道盡備於六經一日之間萬幾待理必習漢字曉漢書始上意得達而下情得通伏祈擇滿漢詞臣朝夕進講則聖德日進而治化日光矣○戶兵二部議覆順天巡撫宋權奏祖傳軍籍隸在營路選取民壯隸在州縣二差掇累爲民大害允宜速罷從之○兵部議覆河南巡撫羅緒錦奏請罷修築邊工班軍從之○丙申定國大將軍豫親王多鐸等奏二月十四日大軍由西安府抵河南招降流賊鎮守河南僞平南伯劉忠旋得平定江南之諭卽於三月初五日南征因齎解所獲西安府及潼關二處金印八顆及金銀珍珠絀段等物○戊戌諭内外大

小各衙門曰凡陳奏本章照故明例殊覺遲誤今後部院一切奏章可卽速奏候旨遵行至於各衙門應屬某部者有應奏事宜卽呈該部轉奏至直省撫按總兵等官凡有章奏與某部相涉者亦必具文該部部臣卽請旨定奪或部臣不聽致有遲誤或部議外謬不合事宜或冤抑苦情不肯代爲上達或有參劾部臣章奏俱赴都察院卽爲奏聞其有與各部無涉或條陳政事或外國機密或奇特謀畧此等本章俱赴內院轉奏○庚子故明文淵閣大學士李建泰來京陛見慰諭之○壬寅諭征錦州杏山山海關功將士升授有差贈死事者官子弟襲職○癸卯允工部議山東省額解甲冑弓矢弓弦刀天鷲鹿皮狐皮俱徵折色○乙巳遣八旗官軍番戍濟甯○丙午遣朝鮮國王次子李湜歸國○戊申諭戶部近聞出征所獲人民有祖父母及伯叔兄弟親子伯叔之子並

元配妻未經改適在籍者甚多爾等如情願入滿洲家與兄弟同處可赴部稟明如實係同胞兄弟卽令與同處若係遠支兄弟則勿令同處又聞貧民無衣無食飢寒切身者甚眾如因不能賣生欲投入滿洲家爲奴者本主稟明該部果係不能賣生卽准投充其各謀生理力能自給者不准爾小民如以遠支兄弟爲近支本可自給而詐稱無計資生及既投入滿洲後復稱與己無預雖告不准至各省人民有既經犯罪欲圖倖免白於該部情願投充該部不知其有罪輒令投充嗣後得實仍坐罪不宥此等投充旗下人民有逃走者逃人及窩逃之人兩鄰十家長百家長俱照逃人定例治罪○大學士剛林等奏盛京原定六部爲一品內三院爲二品今六部係二品銀印通政使司詹事府係三品翰林院係五品俱銅印奏請酌定得旨內三院照盛京爲二品衙門○己酉免

蘇州元年稅糧○壬子故明山海總兵懷仁伯馬科降○河南巡撫羅繡錦奏衛輝鎮後營參將趙士忠等攻破婁兒寺賊寨擒賊首沈四等獲馬匹牛羊火器無算太行一帶賊巢悉平○定國大將軍豫親王多鐸等奏三月初七日臣統兵出虎牢關口固山額真拜尹圖等出龍門關口兵部尙書宗室韓岱梅勒章京伊爾德侍郎尼堪等統外藩蒙古兵由南陽路三路兵同趨歸德所過州縣盡皆投順兵科凌駟逃往南中復爲御史出巡河南適在歸德亦已擒獲南陽僞副將李好獻札投誠隨給札升爲總兵官河南開封歸德三府屬州縣已委官管理內院中書趙文蔚升爲河南兵備道王永亦升爲清軍道總兵官高第畱鎮河南孔希貴畱鎮歸德惟開封府尙未畱兵駐防許定國及投誠賊首劉芳興等俱隨營南征河南地方初定請速鑄給各官印信以防詐僞得旨王

方收關陝旋定中原勦寇安民勦虜茂著朕甚嘉悅所請地方各官印信卽與鑄給

夏四月丙辰遣漢軍八旗官各一員駐防盛京○以蔣赫德爲內國史院學士劉清泰爲內弘文院學士○歸化城章京古祿格等來貢○丁巳禮部奏故明時給僧道度牒俱納銀三兩二錢今應否納銀給牒請旨定奪得旨俱著寬免○庚辰禮部奏四月初八日係佛誕之期舊例於是日浴佛而故明並無此例得旨仍照舊例浴佛多羅郡王以上俱往祭是日著停刑禁止賽神屠宰各旗滿洲蒙古漢軍俱照舊傳諭○辛酉以王文奎爲兵部右侍郎兼右副都御史總督陝西由保定巡撫遷焦安民爲右副都御史巡撫甯夏由山西雁平道參政遷黃圖安爲右僉都御史巡撫甘肅由直隸易州道僉事遷張忻爲兵部右侍郎兼右副都御史巡撫天津故明刑部尙書郝晉爲兵部右

侍郎兼右僉都御史巡撫保定

由刑部右侍郎遷

調雷輿巡撫陝西

由天津巡

撫調

○諭民間喪葬毋許出正陽門著爲例○禮部議覆給事中龔

鼎孳奏故明舊制考取舉人第一場時文七篇二場論一篇表一

篇判五條三場策五道今應如科臣請減時文二篇照故明洪武

時例用時文五篇於論表判外增用詩去策改用奏疏至京城貢

院頽壞應卽修葺得旨考試仍照舊例行貢院著卽修葺○癸亥

諭戶部前許民人投旗原非徧勒爲奴念其窮苦飢寒多致失所

致有盜竊爲亂故聽其投充資生近聞或被滿洲恐嚇徧投者有

之或誤聽屠民譌言畏懼投充者有之今欲平定天下何故屠民

且將及一載虛實已見有何驚疑此後有實不聊生願投者聽不

願投者毋得徧勒○轉李化熙爲工部左侍郎以趙京仕爲工部

右侍郎

由太僕寺卿遷

○甲子命葬故明殉難太監王承恩於故主陵旁

給香火地六十畝仍建立碑額以旌其忠○丁卯詔曰流賊李自成弑君虐民多行悖逆神人共怒自速誅亡知朕誕膺天命撫定中華尙敢竊據秦川抗拒聲教爰命豫親王移南伐之眾直擣嶠函英親王秉西征之旄濟自綏德旬月之間全秦底定憫茲黎庶重遭湯火特施浩蕩咸與維新其爲賊所誣誤者咸赦除之竝蠲一切逋賦大兵所過免今年稅糧之半餘免三之一○庚午御史趙開心奏古來明目達聰敷求讜言必朝夕接見諫臣盈廷天子咨詢百官獻納而後下無不達之隱上無不善之施今立政之始一事之得失一言之通塞關天下萬世之利害其中大綱大法固須講求卽細節隱情尤須洞晰凡有奏疏不能盡陳封章不敢頻瀆者祈時假召對審顏聽受一切用人行政應否行止斟酌立斷史臣立書以成泰交盛事奏入是其言召對著候旨行○癸酉

調邱茂華爲河南按察使司副使兼布政使司參議管左布政使

事由井陘道

以吳景道爲河南布政使司參議管右布政使事

由都

事由理

孟良允爲河南布政使司參議兼按察使司僉事管按察

使事

由昌平道

○甲戌以孟喬芳爲兵部右侍郎兼右副都御史

總督陝西三邊

由刑部左

其保定巡撫王文奎仍畱原任郝晉候

另用○以太宗文皇帝第八女固倫公主下嫁科爾沁土謝圖

親王巴達禮子巴雅思護朗○辛巳諭戶部我國家荷天休命底

定中原滿漢官民俱爲一家所以分給田廬原欲資其生養彼此

交利貿易宜公今聞各處莊頭人等輒違法禁擅害鄉村勒價強

買公行搶奪踰房垣毀倉廩攘其衣服貲財少不遂意卽恃強鞭

撻甚至有捏稱土賊妄行誣告且狡猾市僧甘爲義子豪僕種種

不法肆行橫惡殊爲可憾爾部徧行嚴查如有不遵法紀者俱行

治罪傳諭各處撫按道府州縣各官不論滿洲及滿洲家漢人若有違法犯禁者卽拏來京如滿洲恃強不服拘拏卽識其姓名居址赴京控告便差人逮問若地方官不能稽查卽屬庸懦溺職刑部官有所徇縱卽屬挾私誤公國法具在斷不輕饒但不許聽無據虛詞妄行具奏滿漢買賣人俱從公交易不許爭鬪啟釁致誤生理爾部可速刊示通行曉諭俾新舊兵民各安生業共享太平○諭吏部近覽各官章奏本以爵位爲榮而故飾虛名具奏控辭有至再至三者此蹈故明舊習甚無取焉今後若再如此卽罷斥不用如政務未當宜明切敷奏指實入告自應聽納至老疾丁艱者理合奏請該部仍循例行○初行武鄉試

五月壬午朔河道總督楊方興進濟甯州瑞麥有三四歧者有八歧十歧者得旨時和年豐人民樂業卽是禎祥不在瑞麥地方官

當益加撫輯惠養元元副朝廷愛民德意○初招撫山東侍郎王鰲永薦舉故明漕運總督郭尙友至是尙友以老病辭允之○癸未以旱命刑部慮囚○命內三院大學士馮銓洪承疇李建泰范文程剛林祁充格等纂修明史○丙戌輔政王濟爾哈朗及內大臣等定議以皇叔攝政王代天攝政雖賞罰等於朝廷而體統尙未崇隆夫爲皇上輔國立政所關至重一切儀制亦應加禮啟聞王固辭曰予在上前未敢違禮他處如汝等議行可也翌日王肩輿入朝滿洲諸臣皆跪王見遂回輿因謂大學士剛林祁充格曰予未有言諸臣何故皆跪今予乃入君之朝也汝等卽欲行禮當於他處行之乃行之朝門予豈有徑受之禮若子竟前進諸王亦如此行禮予心更何安遂引輿而返於是令大學士剛林祁充格學士詹霸等傳語大學士馮銓李建泰等曉諭諸

漢官銓等皆曰誠賢明之王也○宣大總督李鑑奏許林堡灰溝

營流賊悉平○丁亥賜諸王以下及百官冰著爲令○以王正忠

爲延綏巡撫

故明戶部左侍郎

○免高密縣元年稅糧○戊子御史姜金

允奏我朝刑書未備止用鞭辟臣以小民無知犯法情有大小則
罪有輕重斬之下有絞徒流笞杖不忍盡死人於法也斬有立決
復有秋決於緩死中寓矜全也故歷朝有大理覆奏有朝審熱審
又有臨時停刑蓋死者不可復生恆當慎之今修律之旨久下未
卽頒行非所以大恻 皇仁請敕部速行定律以垂久遠得旨著
作速彙輯進覽以便裁定頒行其復奏朝審熱審停刑各款著三
法司一併詳察舊例具奏○御史馬兆燧奏輦轂之下盜賊竊發
及至捕獲少長盡置之法臣以爲殲厥渠魁脅從罔治其老穉不
能彎弓操刃者望加矜宥以廣罪人不孥之意若戶婚田土宜早

定例令兼用笞杖徒流開其一面俾得自新章下所司知之○己

丑妖民劉伯泗掘穴得石匣內函天書又石彈內有元帥印遂自

稱天罡星宣府巡撫馮兆聖捕獲以聞斬之○庚寅以王文奎爲

兵部右侍郎兼右副都御史總督淮揚由保定趙福星爲右僉都

御史巡撫鳳陽由宿遷兵○以聶明楷爲陝西左布政使由山西

使劉宏遇爲陝西布政使司參政管右布政使事由朔州○給事

中郝傑奏巡按一官安民察吏任甚重也凡糾彈所及無敢起而

紛更之者今柳寅東劾朱盛湍等張鳴駿劾馬如繹等忽有喚問

回任之事竊恐喚問不已必爲辯駁辯駁不已必爲詬誶以致白

簡無靈事權倒置從此容嘿依阿誰爲皇上發奸逐佞者乞念

巡按爲朝廷耳目之司凡遇舉劾唯敕部察例覆請儻有未當

令該衙門堂官嚴加考察以示勸戒則風憲重而紀綱肅矣得旨

御史察吏安民全以糾彈爲職喚問回任二事委屬不便嗣後仍照舊例行備舉劾不當嚴加考覈○壬辰故明左副都御史賈毓祥恩詔起用以老疾辭允之○癸巳諭禮部故明妃嬪所需夏季床扇及患病食用不敷者查實以聞○改折泰安州額解棉布一年以木棉價湧累民故也○欽天監管監正事湯若望奏宸居重地負陰抱陽陰宜斂藏陽宜開廣棋盤街房屋蔽塞宜禁文德武功兩坊左右相配今文德坊已火卽宜修建從之○乙未御史趙開心奏本月初五日朝期諸臣跪迎攝政王王至卽回是知尊王而不知王之尊朝廷宜其兢然而返也初七日鴻臚寺官復令謝恩諸臣至端拱門行禮夫以皇叔之親而兼攝政王之尊原與諸王有異卽臣民甯肯自外於拜舞第王之恩皆皇上之恩中外莫不傾戴豈在此區區拜跪之間故羣臣謁見王時正當限

以禮數辨其衣冠與朝見 皇上之禮不同庶諸臣不失尊王之
意亦全王所以尊 皇上之心此儀制宜定者也稱號必須正名
臣見 上諭皆稱叔父攝政王夫叔父爲 皇上叔父惟 皇上
得而稱之若臣庶皆呼則尊卑無異矣臣以爲當於叔父上加一
皇字庶上下辨而體統尊此名義宜定者也下禮部詳開儀注以
聞○丁酉以郝晉仍巡撫保定○戊戌敘迎順各官功授恭順侯
弟吳惟華爲恭順侯錦衣衛提督東司房太子太傅左都督駱養
性爲太子太師海運副將都督同知海時行爲右都督錦衣衛指
揮同知吳惟蕃爲指揮使錦衣衛指揮僉事吳惟莊爲指揮同知
御史趙開心於應升京堂職銜加一級○命滿洲子弟就學分爲
四處每處俱用伴讀十人勤加教習十日一次赴監考課遇春秋
演射五日一次就本處習練俾文武兼資以儲實用從國子監祭

酒薛所蘊請也○免山西平度壽光等六州縣元年額賦○故明
中書舍人張朝聘助木千株修建宮殿自請議敘得旨用人惟以
才德豈有因捐助授官之理此項木原從何來著經營官察明酌
量給價○開陝西鼓鑄○給事中孫襄奏犯人家口入官婦女至
於給配漸恐廉恥道喪節義風微臣以爲惟叛逆強盜應盡誅沒
此外均宜及身而止至修律屢降綸音諸臣或以開勑之始未免
過於鄭重而不知此非可以勑爲者但取清律明律訂其同異刪
其冗繁卽足以憲百王而垂後世似無事過爲紛更得旨家人入
官原處重罪豈得濫及著確擬條例具奏修律但宜參酌同異刪
除冗繁不必過爲紛更所奏是刑部知道○庚子免山東濟陽章
邱二縣京班匠價並令各省俱除匠籍爲民○甲辰禮部議定攝
政王稱號及儀注凡文移皆書皇叔父攝政王一切大禮如園獵

出師操演兵馬諸王貝勒貝子公等聚集之所禮部俱啟傳集等
候其各官則視王所往列班跪送候王回令諸王退則退貝勒以
下送及王府門方退其集候各官跪迎如前遇元旦及慶賀禮滿
漢文武諸臣朝賀 皇上畢卽往賀皇叔父王若諸王侍坐於皇
叔父王前親王及饒餘郡王不叩頭而坐承澤郡王衍禧郡王以
下叩頭坐皇叔父王若餽財畜食物於禮親王則令人受不叩頭
若餽諸親王及饒餘郡王財畜俱立受俟後入見時令人啟之謝
與不謝一聽皇叔父王命儒有事差遣及齎賞之人遇諸王於道
過諸王門俱不下馬若齎食於諸親王及饒餘郡王俱立受不叩
頭承澤郡王衍禧郡王以下跪受叩頭若升賞官員於 皇上前
謝恩於皇叔父王不謝其自外入自內出各官朝 皇上畢卽往
見皇叔父王若賜茶飯饒餘郡王以上不叩頭承澤郡王衍禧郡

王以下照常例叩頭皇叔父王於午門內從便下轎諸親王郡王
於午門外下轎○乙巳免皇店租及崇文門米麥稅○丁未科爾
沁國土謝圖親王巴達禮歸國攝政王遣大學士剛林祁克格南
完我諭曰天下大業已定正黎庶休養之時然恐蒙古造孽緩則
密奏候旨其有急不及奏者爾即便宜行事吾惟爾是恃巴達禮
對曰臣昔蒙 太宗皇帝寵眷今又沐王殊恩敢不誓死以報○
戊申遣工部尙書星訥等往祭朝鮮故世子李滢○己酉定國大
將軍豫親王多鐸等奏大軍於四月初五日自歸德府起行沿途
郡邑俱已投順十三日離泗州二十里令固山額真阿山率蒙古
固山額真馬喇希富喇克塔及將士前奪泗北淮河橋其守泗總
兵焚橋遁我軍遂夜渡淮翌日追五十餘里不及十七日遣尙書
宗室韓岱梅勒章京伊爾德護軍統領阿濟格尼堪署護軍統領

杜爾德率師至揚州城北獲船百餘艘是日大軍距揚州城二十里列營令署護軍統領顧納代伊爾都齊費揚古吳喇禪梅勒章京阿哈尼堪署梅勒章京格霸庫等率師自揚州城南獲船二百餘艘十八日大軍薄揚州城下招諭其守揚閣部史可法翰林學士衛允文及四總兵官二道員等不從二十五日令拜音圖圖賴阿山等攻克揚州城獲史可法斬於軍前其據城逆命者並誅之五月初五日進至揚子江時僞福王下鎮海伯鄭鴻逵以水師守瓜州曹總兵以水師守儀徵汛地初六日我軍陳北岸相距三月初八日晚令拜音圖圖賴阿山率舟師由運河潛至南岸列於江之西距瓜州十五里初九日復令梅勒章京李率泰率舟師五鼓登岸黎明渡江官兵陸續引渡令左翼舟師畱泊北岸敵至則以礮夾攻之初十日聞福王率馬士英及諸太監潛遁十五日我軍

至南京忻城伯趙之龍率魏國公徐文爵保國公朱國弼隆平侯
張拱日臨淮侯李祖述懷甯侯孫維城靈璧侯湯國祚安遠侯柳
祚昌永康侯徐宏爵定遠侯鄧文園項城伯常應俊大興伯郝順
益甯晉伯劉允基南和伯方一元東甯伯焦夢熊安城伯張國才
洛中伯黃周鼎成安伯柯祚永駙馬齊贊元內閣大學士王鐸程
正授禮部尙書錢謙益兵部侍郎朱之臣梁雲構李綽給事中林
有本陸朗王之晉徐方來莊則敬及都督十六員巡捕提督一員
副將五十五員竝城內官民迎降其沿途來歸者與平伯高傑子
高元照廣昌伯劉良佐提督李本深總兵胡茂楨張士元郭虎楊
承祖李中星何應昌翟鳴鳳王之剛李遇春張天祿張天福李成
棟李棲鳳等二十三員監軍道張建柯起鳳二員副將四十七員
參將遊擊共八十六員馬步兵共二十三萬八千三百捷聞得旨

皇天眷佑 宗廟式靈王公將士分猷宣力方平河朔旋定江南覽王奏報朕甚嘉悅應行祭告詔赦事宜卽擇吉具饗呈覽王躬履戎行指麾調遣克奏膚功特遣侍臣前赴軍中慰勞一應有功將帥官兵作速察敘以憑封賞○庚戌宣平定江南捷音○乾清宮成○是月興太和殿中和殿位育宮工

六月癸丑免山西興濟縣元年額賦○甲寅山東巡撫方大猷坐

擅逐縣官當削職因有微勞令以監司用○免近畿園地今年額

賦三之二○予死事副將常鼎等廕○乙卯以丁文盛爲右僉都

御史巡撫山東

由登萊道參政還

○丙辰遣侍衛尼雅達費揚古等齎敕

往諭豫親王多鐸等敕曰覽王等奏捷朕心不勝喜悅前者擊敗

流賊著有懋功未幾平河南取揚州破揚子江水陸諸營直抵金

陵江南遂定此皆王與諸臣同心報國所致深可嘉尙至各郡邑

投誠官員或爲福王所用或爲王等所委俱開明履歷分別註冊
各處文武軍民盡令薙髮儻有不從以軍法從事其郡邑有未下
者或宜移檄招撫或宜統兵征剿地方一切事宜酌議速奏○辛
酉定國大將軍豫親王多鐸等奏南京旣克福王潛遁太平遣貝
勒尼堪護軍統領圖賴固山額眞阿山貝子屯齊和託護軍統領
阿濟格尼堪阿爾津敦拜署護軍統領杜爾德梅勒章京伊爾德
阿哈尼堪前鋒統領努山等率兵追之福王走蕪湖我兵趨擊福
王登舟欲渡江圖賴遂據江口截其去路僞靖國公黃得功逆戰
擊敗之敵兵皆墮水盡奪其舟得功中流矢死僞總兵田雄馬得
功縛福王及其妃來獻竝率十總兵部眾降獲金銀綉段寶玉貂
皮等物無算得旨朕覽王奏福王朱由崧就擒將領兵丁盡行歸
順知道了王平定江南克有成績深可嘉悅本內各營功次一併

詳察以便優敘○免直隸永甯等四縣元年荒地額賦○壬戌順天巡按傅景星奏田地被圍之民俱兌發贖薄屯地若仍照膏腴民地徵輸則苦累倍增應照屯地原額起徵爲便備額賦既減支解不敷再於支解額中量爲裁省下戶部知之○禮部侍郎孫之獬奏故明宦者杜勳嚇君惑眾傾明社稷法無可宥請敕刑部速處得旨杜勳事在赦前該部知道○丙寅諭禮部向來薙髮之制不卽令盡一姑聽自便者欲俟天下大定始行此制耳今中外一家君猶父也民猶子也父子一體豈可違異若不盡一終屬二心不幾爲異國之人乎此事無俟朕言想天下臣民亦必自知也自今布告之後京城內外限旬日直隸各省地方自部文到日亦限旬日盡令薙髮遵依者爲我國之民遲疑者同逆命之寇必寘重罪若規避惜髮巧辭爭辯決不輕貸該地方文武各官皆當嚴行

察驗若有復爲此事演進章奏欲將已定地方人民仍存明制不隨本朝制度者殺無赦其衣帽裝束許從容更易悉從本朝制度不得違異該部卽行傳諭京城內外並直隸各省府州縣衛所城堡等處俾文武衙門官吏師生一應軍民人等一體遵行○遣侍衛綽克圖巴克善等往諭和碩豫親王多鐸等敕曰覽王等奏捷不勝喜悅江南既定福王就擒此皆王與諸臣協力效忠所致王可移文各該地方宣布德意招撫居民錢糧應徵者照常徵收應解京者照常運送其投降騎兵仍畱彼地步兵應畱若干應裁若干爾等酌量裁減蒙古人有投順者俱分隸旗下俟回軍日同赴京師安插口糧照滿洲兵丁支給文武各官印信俟爾等除授文冊到日頒發守洪武陵寢官員且暫畱將其官役地畝錢糧數目俱明註於冊送京裁奪南京或仍爲京或改爲省俟大定日再議

一切緊要圖籍俱著收藏毋失○丁卯鎮守廬鳳淮揚等處固山額真準塔等奏五月間臣自徐州水陸竝進值劉澤清下副將高佑統戰艦攻宿遷官兵大敗之師次清河澤清所部總兵馬化豹副將張思義等率兵四萬船千餘艘據淮黃清三河口連營十里梅勒章京康喀賴同遊擊范炳吉天相等率兵渡清河列營相距以礮擊敗敵艦復遣都司楚進功率步兵六百人拒黃河北岸鳴礮相應又分兵兩路一自清河上游進擊一攻對岸馬步敵兵俱敗之合軍追入淮安界斬其副將二參將一師次清江浦監司范鳴珂攜敕印來降澤清同偽總兵田仰各率兵丁家口登舟遁偽總兵柏永馥率所部及城中官民出迎遂克淮安其鳳陽廬州一帶望風納款臣隨領兵巡歷各處安撫居民委署官吏是役共投降監司一總兵一副將二十三參將二十五遊擊四十都司守備

七十三獲船五百餘艘馬九百餘匹囊駝二十五隻紅衣礮一百二十位銀四萬七千兩下兵部察敘○陝西總督孟喬芳奏妖賊胡守龍等假焚祝之名陰行煽惑聚眾數萬自稱徐會公僭號清光元年造妖符妖印結黨倡亂一日臣方坐署喧傳有數龍自天而下少頃鄉約首送前龍視之乃皇極妖經一卷也臣隨懸賞格購其渠魁爲民人楊仍祖所首遣副將陳德等領兵擒斬守龍散其脅從妖黨悉平○戊辰 皇太妃薨○庚午河道總督楊方興等奏山東滿家洞界連四縣穴有千餘周回二三百里自明季荒亂頻仍窮民走險聚眾其內分布四面各數十里其最著者有羊山金山大義集合義集羅家屯桑科集等處而滿家洞其總名也元年七八月間劫掠焚殺殆無虛日臣遣濟甯道朱國柱東充道章于天率沂臨鎮兵及各處鄉兵往剿凡四戰皆敗之賊勢大潰

二年正月復猖獗會肅王大兵駐濟甯發滿兵擣其巢殺賊無算賊勢益窘俱竄伏洞中王畱滿兵二百同鎮兵鄉兵六千人困守之誘斬賊首宮文彩等二十餘人後肅王回京饒餘王繼至申明號令攻賊益力隨破隨填其穴殲除殆盡止餘二大洞爲賊老巢內有重關夾道暗伏火器人不敢入因絕彼汲道聽其自斃有突出者輒殺之五月饒餘王亦還京臣增調官兵圍守益固賊皆自縊諸洞悉平下所司察敘○辛未命江南鄉試於十月舉行○遣何洛會率師駐防西安○吏部右侍郎熊文舉引疾求罷允之○甲戌子殉難署清化同知史燦麟及妻高氏孟縣知縣王曰俞祭○戶部奏直省俵馬通行永折每匹徵銀三十兩從之○丁丑禮部右侍郎何瑞徵以老病乞休允之○己卯詔曰本朝立國有年幅員既廣無意併兼向來疆場構兵本欲言歸於好不期寇兇極

禍明運永終於是整旅入關代爲雪恥猶以賊渠未殄不遑起居
隨命二王誓師西討而南中乘釁立君妄僭尊號亟行亂政重困
人民朕用是夙夜祗懼思救焚黎西賊旣摧旋命南伐兵無頓刃
循汴抵淮甫克維揚隨平江左金陵士女紹我見休旣復福藩南
土畧定特宏大賚嘉與維新其河南江北江南官民誑誤咸赦除
之從前橫征逋賦悉行蠲免大軍所過免今年稅糧之半餘免三
之一○故明總兵高進忠率部將黃中色等六十七人同都御史
王燮御史蘇京自海中雲臺山請降得旨江南旣入版圖天下一
統朝廷方招羅俊傑廣示包容總兵高進忠並文官王燮蘇京抒
誠歸順良可嘉悅著遣官齎詔往諭又馬登洪林慶業等已曾歸
順後聞福王僭號南京遂不果來今福王被擒登洪等心懷疑愧
逡巡島嶼殊爲可念特將前罪盡行赦免亦差官齎詔招徠撫慰

若遵制薙髮幡然來歸許與新順將帥一體優敘

閏六月辛巳朔登萊巡撫陳錦奏東省文武鄉紳初以懼亂南逃近皆絡繹回籍請分別南甯月日係未歸順以前者准給故業仍聽薦用其在歸順後者似應酌議處分得旨回籍鄉紳俱准赦罪○癸未通政使李天經以諸司章奏太繁請嚴申飭以明職掌得旨凡撫鎮按臣奏報及賀捷章奏准封進謝恩者概免起送舉人止轉咨禮部不必具奏在籍鄉紳開具簡明履歷具奏毋得蒙混監司等官一切事情悉聽撫按代題總鎮臣除關軍機及兵馬錢糧外餘俱歸督撫具奏該衙門通行嚴飭有故違者執法駁參○甲申靖遠大將軍英親王阿濟格等奏流賊李自成率西安府馬步賊兵十三萬竝湖廣襄陽承天荊州德安四府所屬各州縣原設守禦賊兵七萬共計二十萬聲言欲取南京水陸竝進我兵亦

分水陸兩路躡其後追及於鄧州承天德安武昌富池口桑家口九江等七處降者撫之拒者誅之窮追至賊老營大敗賊兵八次賊兵盡力窮竄入九宮山隨於山中徧索自成不得又四出接緝有降卒及被擒賊兵俱言自成竄走時攜隨身步卒僅二十人爲村民所困不能脫遂自縊死因遺素識自成者往認其屍屍朽莫辨或存或亡俟就彼再行察訪俾自成兩叔僞趙侯僞襄南侯竝自成妻妾二口獲金印一顆又獲僞汝侯劉宗閔竝一妻二媳自成養子僞義侯姜耐妻僞齊侯顧英妻僞總兵左光先竝一妻三子及術士僞軍師宋矮子又獲太原府故明晉王二妃其自成兩叔及僞汝侯劉宗閔俱斬於軍自成又有妻妾三口因追急投揚子江死計我兵追躡自成及分翼出師敗賊凡十有三戰獲駝三十一馬廩六千四百五十船三千一百八艘又有故明甯南侯左

夏王子夢庚總督袁繼咸守道李猶龍巡按黃澍率總兵十二員馬步兵十萬竝家口泊舟於九江之東流縣界揚子江中俱投降其帶大小船艘四萬合計河南屬城十二湖廣屬城三十九江西屬城六南京屬城六共六十三城設官撫定得旨逆賊李自成罪惡貫盈神人共怒朕恭行天討定亂救民覽王奏報知督兵追勦直至九江破賊眾二十餘萬所獲馬駝船艘各數千計賊寇蕩平及收降故帥左夏王子夢庚等兵十萬人船四萬艘河南湖廣江西江南等處盡皆歸順朕甚嘉悅 郊 廟 社稷祭告禮儀卽擇吉舉行王運籌決勝茂著勲庸特遣侍臣前赴軍中慰勞一應有功內外王公將士作速察敘以憑封賞○丙戌定羣臣公以下及生員耆老頂帶品式○己丑河決王家園○庚寅遣侍衛坤巴圖魯齋書往諭英親王阿濟格等曰頃者覽王奏捷知王與諸將

同心奮勇埽滅逆寇克奏膚功朕甚嘉悅念王及行間將士驅馳
跋涉懸崖峻嶺深江大河萬有餘里亦可謂勞苦而功高矣今寇
氛既靖宜卽班師其左夢庚及河南北招撫兵丁亦與偕來餘兵
應畱充軍伍或散歸田里王與諸大臣商榷行之故明晉藩二王
妃可優禮衛送來京○陝西總督孟喬芳奏秦屬有司仍襲故明
陋習每一官蒞任輒有鋪設其費多至一二千兩不等請嚴禁以
甦民困得旨地方官貪婪不悛深可痛憾一切鋪設銀兩宜嚴行
禁革儻仍前濫取害民該督撫按糾劾究治毋得姑息○辛卯改
江南民解漕白二糧官兌官解○壬辰諭六部都察院朝廷設官
分職各有專司都察院及科道原爲耳目之寄凡有政治關失賢
人蔽抑不肖賄進及諸司忽畧職事推諉稽延貪饕作弊竝官民
冤苦等事卽指名據實明白陳奏斯爲稱職若浮泛揣摩輒具章

奏言既失實事必難行是以耳目之寄反閉塞耳目也至在內六部文武衙門在外督撫鎮按道府州縣營衛等官均屬政事之司果能矢忠矢公清廉勤慎各盡職業天下自致太平若乃舍己職掌越俎出位妄言條奏徒博虛名貽誤政事實心爲國之人斷不如是明季諸臣竊名譽貪貨利樹黨與肆排擠以欺罔爲固然以奸佞爲得計任意交章煩瀆主聽使其主心志眩惑用人行政顛倒混淆以致寇起民離禍亂莫救覆轍在前後人炯鑒亟宜痛加悛改豈容仍襲故套以蹈顛蹶今天下已將混一百事枘始政務殷繁一切事宜當從實遵行其含糊無用之言必不可聽以後內外大小諸臣宜共體此意永爲遵行儻或故違究治如律○定滿洲文武官品級○癸巳命內大學士太子太保兵部尙書兼右副都御史洪承疇以原官總督軍務招撫江南各省○保定巡撫郝

晉奏請定優免蠶一之規得旨戶禮二部酌定品官及舉貢生員
雜職吏典應免丁糧其廢官黜弁粟監貲郎俱與民間一例當差
有冒濫優免者該撫按劾治○鳳陽巡撫趙福星奏鹽課爲軍需
所關今各商所行皆前朝舊引其中不無溷圖請速給新引以裕
國課得旨戶部卽與給發○甲午定諸王貝勒貝子宗室公頂帶
式○乙未除割腳筋法○裁大同府清軍同知○丁酉諭直省武
科中式名數俱照舊額○癸卯以恭順侯吳惟華爲太子太保兼
右副都御史總督軍務招撫廣東禮部左侍郎孫之綱爲兵部尙
書兼右副都御史翰林院侍讀學士提督軍務招撫江西尙寶寺
卿黃熙允爲兵部右侍郎兼右僉都御史招撫福建原任大同巡
撫江禹緒仍以兵部右侍郎兼右僉都御史提督軍務招撫湖廣
刑部郎中丁之龍爲兵部右侍郎兼右僉都御史招撫雲貴○定

國大將軍豫親王多鐸等奏定南京後令貝勒博洛固山額真拜尹圖阿山等率兵趨杭州招撫浙省我兵至杭賊分兩路迎敵大敗之是夜賊兵悉渡錢塘江逃竄我兵追至江岸駐營賊兵見之以爲江潮朝夕有信我兵必被淹乃潮水連日不至聞郡驚爲神助潞王大恐遂率眾開門納款浙西湖州嘉興浙東紹興甯波台州嚴州等府亦皆歸順紹興淮王渡江來見復遣人至湖州繫周王眷屬移杭安置收總兵王之仁所部兵將二萬五千人又聞杜陽王在廬州和州作亂隨令總兵官吳兆勝等率師往剿獲杜陽王竝其妻子得旨覽王奏報官兵進取杭州潞王勢窮歸順浙江各府盡報遵依總兵王之仁率眾投降杜陽王作亂擒獲俱知道了了王頻奏奇勲朕甚嘉悅有功將帥官兵速行察敘○乙巳諭南京著改爲江南省設官事宜照各省例行但向來久稱都會地廣

事繁諸司職掌作何分任聽總督大學士洪承疇到時酌妥奏聞
○命陝西於十月行鄉試○丙午定河南鄉試中額九十四名山
東孔裔照舊用耳字號中一名○允禮部請頒科場事宜因論明
朝宗室例不出仕末季破例進用遂致擾民竟亡其國今正欲平
治天下豈可復用此曹以滋擾害以後概不用已用者俱著解任
其考取舉貢生員永行停止使爲太平之民○丁未詔故明宗室
已絕者產入官見在者分別給贍田入民冊○登萊巡撫陳錦奏
勦平巨寇張廣等○戊申改應天府爲江甯府府尹爲知府○回
回國天方國來貢○投誠僞東平侯劉澤清奏請奉母回籍不允
命赴京朝見

東華錄

臣周澂蕃恭校

秋七月壬子命貝勒勒克德渾爲平南大將軍同固山額真葉臣等往江南代豫親王多鐸○設守明太祖陵太監四名人丁四十人祀田二百晌○賜招撫南方內院大學士洪承疇敕曰朕以江南初經歸命其餘各省遠邇未同恐已歸者尙多驚疑未附者或懷觀望保釐南土實賴股肱是用命卿招撫江南各省地方總督軍務兼理糧餉馳往江南昭宣德意一遵近日恩赦詔款覈實舉行使新附兆民咸霑實惠凡滿洲大兵直省官兵各有統領卿宜會同固山額真葉臣及督撫鎮等官調遣約束其有不法擾民在各旗旗下者卽移文咨會依法處治毋使困民江南各省已經歸

順者卽責成撫按問民疾苦興利除害速圖善後之策未歸順者
先以文告再三曉諭果不服從方可加以師旅卽有攻討亦以平
定安集爲先其閒進止機宜密與平南大將軍貝勒勒克德渾參
酌施行其深山窮谷聲教未通或有頑梗無知乘機嘯聚卽移檄
撫鎮等官多方解散如有不悛速令剪除凡南方降服水陸諸軍
宜移會各督撫挑選精壯參用滿漢教成水軍以備不時調用軍
資糧餉俱從各省地方通融支給如有福王新設兵丁盡行革除
其額軍應汰老弱及解散降民須申飭各屬安插得宜毋令失所
凡關國計民生大利大害不時馳奏請旨興革其山林隱逸及故
明廢紳才德堪用者從公諮訪徵聘來京或軍前先委署事者開
列上聞下部察覈實授所屬文武有才望出眾禦侮保民顯著成
績者特奏薦擢如奸貪庸懦卽奏請罷斥毋延時日致誤地方至

用兵之際有稽遲糧運違誤軍機或臨陣退縮殺良冒功及借軍興以剝民侵兵餉以肥己文官五品以下武官副將以下皆以軍法從事鎮道等官飛章參劾其江甯江西湖廣及將來歸附各省悉聽節制敕中開載未盡事宜准便宜舉行卿以輔弼忠貞膺茲重寄宜開誠布公集思廣益慎持大體曲盡羣情期於德威遐布南服永清朕方崇帶礪用答膚功毋得因循輕率偏執乖方有負倚託至意○癸丑鎮守淮揚等處固山額真準塔等奏故明東平侯劉澤清率所部兵丁並文武各官歸順原住石城團總兵馬登洪朝鮮總兵林慶業亦降○乙卯允吏部議豫親王多鐸委署江南官職三百七十三員准實授○以劉應賓爲右僉都御史巡撫安廬池太故明通政使土國寶爲右副都御史巡撫江甯由總兵遷○丙辰以都督同知謝宏儀爲右都督招撫廣西○戊午諭禮部官民旣

已雉髮衣冠皆宜遵本朝之制從前原欲卽令改易恐物價騰貴一時措置維艱故緩至今日近今京城內外軍民衣冠遵滿式者甚少仍著舊時巾帽者甚多甚非一道同風之義爾部卽行文順天府五城御史曉示禁止官吏縱容者訪出併坐仍通行各該撫按轉行所屬一體遵行○己未允吏部議英親王阿濟格委署湖廣江西南江官職五十員准實授○以祝世允爲戶部侍郎○以何鳴鑾爲右僉都御史巡撫湖廣故明興國州知州高斗光爲兵部右侍郎兼右副都御史巡撫偏沅故明鳳陽巡撫潘士良爲兵部右侍郎兼右僉都御史撫治鄖陽由刑部右侍郎遷南洙源爲湖廣布政使司參政管左布政使事由山西陽和道遷李嵩爲湖廣右布政使由山東督糧道參政遷○庚申以給事中朱鼎藩係故明宗室賞銀令致仕○烏朱穆秦部落車臣親王來貢○壬戌以李若琳爲禮部左侍郎高爾儼爲禮部

右侍郎○加招撫廣西右都督謝宏儀兼右僉都御史提督軍務

○甲子上 太祖武皇帝 孝慈武皇后 太宗文皇帝玉冊玉

寶於 太廟○乙丑以陝西西安延安被賊蹂躪特甚免本年額

賦之半其餘六府一州免三之一○戊辰內大臣何洛會河南巡

撫羅繡錦等奏我兵進克西平縣賊首劉洪起伏誅汝甯等處悉

平下部議敘○河決兗西新築月隄○己巳攝政王遣甲喇章京

巴都等至靖遠大將軍英親王阿濟格軍諭曰此來遣人迎勞原

以兵丁遠行勞苦故也至於王及行閒大臣本應遣官特迎但爾

等先稱流賊已滅李自成已死賊兵盡皆剿除故告祭 天地

太廟宣諭中外後又言自成身死是真戰敗賊兵凡十三次則先

稱賊兵盡殲者竟屬虛語今又聞自成逃遁見在江西此等奏報

情形前後互異以此諭眾已駭聽聞況經告祭 天地 太廟豈

有如此欺誑之理又爾等既稱在江西候旨乃竟啟行前來若果候旨則當於彼處坐候已經啟行何復誑稱候旨爾等之意特以奉命剿除流寇如不稱流寇已滅李自成已死則難以班師故行欺誑耳爾等雖行誑稱其誰信之以此不遣使迎王及諸大臣也○詔自今內外章奏俱由通政使司封進○庚午以保定知府朱帥欽係故明宗室賞銀一百兩令致仕○壬申定歲給故明宗室贍養銀兩地畝親王銀五百兩郡王銀四百兩鎮國將軍三百兩輔國將軍二百兩奉國將軍一百兩中尉以下無論有無名封及各王家下人丁每名各給地三十畝○甲戌太常寺典簿王文言奏江南長江一帶扶蘆數千餘里中多腴地乞遣臺臣部臣以次清查立爲蘆政以充國用得旨江南初經歸附治平急務惟在安民王文言何得藉端言利不准行○丁丑調金之俊爲吏部右侍

郎由兵部右調陳錦爲右副都御史提督操江兼管巡撫由登萊巡撫調○御史

吳達奏今一切舉用人員悉取材於明季然有明季所黜而今日

亟當登用者如抗直忤時孤潔莫援因而放棄山林者是也有明

季所黜而今日不可不黜者如逆黨權翼與貪墨敗類是也有明

季未黜而今日不可不黜者如持祿養交日暮倒行而不恥者是

也在定鼎初年猶可藉招徠名色邪正兼收茲江南底定人材畢

集若復涇渭不分則君子氣沮而宵小競進矣卽如阮大鍼袁宏

勛徐復陽輩聯袂而至實繁有徒豈可惜從順之名概加錄用乎

至言路於開摺尤爲急務凡朝端舉動民生利病吏治臧否何事

不待參酌後定正宜明敕臣工慷慨敷陳勒成一代訐謏乃動輒

責以回奏是阻敢諫之氣而並塞後進之路也卽如趙開心論事

爽剴置之僉院可謂用其人矣而所規切時政者果一一用之否

耶伏乞 皇上下大開兼聽之門苟羣言可採必其實見舉行言路乃國家元氣未有元氣充而不久安長治者也得旨用賢誠係國家要務若得真才惟恐不盡其用朝廷用人非曰誘之若先既錄用後無罪而黜是有疑心矣屢著自行回奏者非沮塞言路正欲求其實與其揣摩影響之言以失真不若確覈以不至於冤抑本內云止用趙開心之身而不用其言著明白確指回奏○鳳陽巡撫趙福星奏僞宏光總漕田仰指薙髮爲名鼓惑奸民作亂殺通州如皋海門牧令臣同梅勒章京譚布等領兵剿撫悉就平定○己卯以李元鼎爲兵部右侍郎由太常寺卿遷楊聲遠爲右僉都御史巡撫登萊由禮部理事官遷

八月辛巳免直隸霸順義等八州縣被災額賦○癸未靖遠大將軍英親王阿濟格師還至盧溝橋攝政王令學士伊圖等往諭因

爾等有罪應議處故不遣人迎接爾等可至午門會齊後卽各歸家於是英親王偕諸王貝勒貝子固山額真等入城至午門會齊各歸家○乙酉免河南彰德衛輝懷慶河南荒地額賦○己丑靖遠大將軍英親王阿濟格率出征諸王貝勒貝子大臣等及投誠故明甯南侯左夢庚等陞見行禮畢賜宴於午門內仍賜智順王尚可喜平西王吳三桂繡朝衣各一襲馬各二匹賜外藩部落王台吉固山額真梅勒章京等金銀朝衣袖段弓馬等物○庚寅給事中杜立德奏閣臣馮銓所行弗類諸臣據實以告非私論也將逾旬日未蒙鑒裁內外大小羣情洶洶嗣後有繫天下國家大事者誰敢再出一語將人臣直言之氣不鼓如是非何如彰輝何祈令滿漢大臣朝堂共議庶幾公論克協法守允垂況如馬士英阮大鍼招權納賄弄其君於股掌宋企郊煽惑流毒神人共憤乃任

其遁而不之捕諱其迹而爲之薦皆非所以示公道昭大權請裁定
定惡邪早抒羣議則真才輩出清平可立慶矣下所司知之○丙
申先是給事中許作梅莊憲祖杜立德御史王守履桑芸李森先
羅國士鄧孕槐吳達等交章劾奏宏文院大學士馮銓原係故明
天啟閹寺魏忠賢黨羽曾向大同總兵姜瓖索銀三萬兩向江禹
緒索銀一百兩其子源淮又設肴饌於內院宴飲禮部左侍郎孫
之獬受源淮賄遂收爲伊標中軍又禮部侍郎李若琳係銓黨羽
其人庸懦無行俱宜罷黜究治請將馮銓父子肆諸市曹命刑部
確訊具奏至是刑部以鞫問無實擬科道各官俱反坐啟攝政王
王於重華殿傳集內院大學士等官及刑部科道各官逐一鞫問
所劾馮銓孫之獬李若琳各款俱無實迹因馮銓自投誠後薙髮
勤職孫之獬於眾人未薙之先卽行薙髮男婦皆改滿裝李若琳

亦先薙髮故結黨同謀陷害於是攝政王諭曰故明諸臣各立黨羽連章陳奏陷害忠良無辜被罰無功濫用釀成禍患以致明亡今爾科道各官如何仍蹈故明陋習陷害無辜據爾所劾三人皆係恪遵本朝法度者卽此足見爾等結黨謀害給事中龔鼎孳對曰馮銓乃背負天啟黨附魏忠賢作惡之人銓曰忠賢作惡故爾正法前此銓卽具奏告歸田里如銓果係魏黨何爲不行誅戮又何爲不行治罪流賊李自成將我故主崇禎陷害竊取神器鼎孳何反順陷害君父之李賊竟爲北城御史王曰此言實否鼎孳曰實豈止鼎孳一人何人不曾歸順魏徵亦曾歸順唐太宗王笑曰人果自立忠貞然後可以責人已身不正何以責人鼎孳自比魏徵以李賊比唐太宗殊爲可恥似此等人何得侈口論人但縮頭靜坐以免人言可也旣而又曰此番姑從寬免爾等罪如再蹈故

明陋習不加改悔定不爾貸後數日以李森先啟內請將馮銓父子肆諸市朝之語過甚令革森先職○戊戌平西王吳三桂奏臣原蒙隆恩准給錦義甯遠中後所安插臣眾後內院傳出義州地土尙畱牧馬將甯錦中右中後前屯中前給臣安插人民又按丁給地五晌查各所房屋灰燼地土瘠窪仰祈增給改撥又臣所統將吏關門血戰歸勦慶都均有微功未蒙敘升加與世襲乞加恩典用勸將來更有請者臣傾心勦寇守關不過臣子職分荷蒙聖恩特授王爵又復蒙恩加稱親王萬難祇承伏懇允辭親字以安愚分下所司速議○丙午梅勒章京屯泰奏江西總兵金聲桓征討益王陣獲叛官王養正等六員鍾祥王朱慈營等九人隨同文武各官審實將叛官正法其故王皆衰殘廢棄或應發原籍姑畱殘喘以彰我朝浩蕩之仁得旨故明諸王無論大小俱著赴京

朝見○丁未先是英親王阿濟格出征時舊令巡撫李鑑釋免逮問赤城道朱壽鏊又擅至鄂爾多斯土默特地方取馬至是法司議罪阿濟格應削王爵奪所屬僕眾量給人役以供使令又從前曾遣董阿賴齎諭固山額真譚泰會同護軍統領鰲拜巴圖魯學士額色黑將英王稱上爲孺子之語集眾傳示而譚泰徇王情面並不集眾傳示又擅至鄂爾多斯土默特地方索取馬匹應將譚泰革職籍其家鰲拜聽信譚泰不行集眾傳示諭辭應革職罰銀一百兩額色黑因係內院官隨征原令不時啟發王意乃竟信譚泰不遵諭行應革職鞭一百誠具啟知攝政王輔政王王諭英親王降爲郡王罰銀五千兩固山額真譚泰削公爵降爲昂邦章京解固山額真任令贖身鰲拜罰銀一百兩此番功績不准議敘額色黑鞭一百折贖

九月庚戌浙閩總督張存仁奏叛賊方國安王之仁從富陽渡江犯杭城遣副將張杰王定國督兵往剿斬首四千級餘賊復盤踞富陽又令定國往餘杭防剿至關頭遇賊對壘我師奮勇掩殺追至小嶺二十餘里斬獲無算陣擒國安子士衍等斬之○癸丑命鎮國公傅勒赫輔國公扎喀納等率師協防江西○乙卯淮安巡撫姜金允奏蕭縣渠寇徐庫等就擒○丁巳河南巡撫羅繡錦奏故明懷安王來歸命察實起送來京○辛酉鎮守廬鳳等府固山額真準塔等奏故明新昌王潛遁海島雲臺山聚眾作亂攻陷興化縣官兵進剿破其巢穴斬首三千級獲新昌王於淮安斬之○甲子諭戶部河間灤州遵化等府州縣凡無主之地查明給與八旗下耕種其故明公侯伯駙馬皇親太監地酌照家口給發外餘給八旗○庚午海寇田仰寇福山江甯巡撫土國寶率副將曹虎

等敗之○以漢中投誠總兵賀珍禦賊有功授爲定西前將軍○
壬申宣府總督李鑑坐與守備霍然有隙故令然變賣倉米部議
褫職詔降總督職以巡撫用○乙亥定讀祝官爲五品○丁丑招
撫江南大學士洪承疇奏江西南康南昌九江瑞州撫州饒州臨
江吉安廣信建昌袁州及江南徽甯等府俱平又奏湖廣僞澤侯
田見秀義侯張勳棉侯袁宗第赴省投誠命照恩詔事例免罪錄
用○喀爾喀部土謝圖汗來貢

冬十月壬午朝鮮國遵諭解白米五萬七百八十餘石至○癸未

以馬國柱爲兵部右侍郎兼右副都御史總督宣大

由山西巡撫遷

○丁

亥以除服遣內大臣宗室錫翰祭

昭陵○

戊子賜攝政王多爾

袞輔政王濟爾哈朗和碩肅親王豪格馬各一匹王等跪受入武

英殿叩首謝恩出

上遣冷僧機巴哈謂攝政王曰凡遇朝賀大

典朕受王禮若此等小節不必行此大禮王曰上年幼冲臣不敢違禮俟上春秋鼎盛凡有寵恩自不敢辭○招撫大學士洪承疇奏徽州一府夙負險阻故明翰林金聲甘心悖逆陰結閩寇受唐王偽敕起鄉兵十餘萬製造甲冑槍礮等項分布山隘以拒我師臣奉貝勒令會同固山額真葉臣一面進剿一面分發告諭宣揚朝廷德意茲提督張天祿總兵卜從善李仲興劉澤沅等由旌德縣進兵連破十餘寨馳至績溪縣生擒金聲並僞官四員斬於軍師至徽州駐營城外不令一兵入城出示安民市肆如故嗣後撫輯招諭事宜俟臣等商確奏聞得旨覽卿奏徽郡已經收服兵不入城秋毫無擾具見運籌制勝紀律嚴明朕甚嘉悅有功鎮將及在事文武各官通著察明敘錄撫輯善後及招諭事宜俱聽卿商確便宜行○庚寅免直隸寶坻縣荒地額賦○壬辰免山

西太原等府州被災額賦○癸巳定國大將軍豫親王多鐸班師還京 上出正陽門於南苑迎勞之○乙未革鳳陽巡撫趙福星

職逮問以不行奏請擅以其弟景星爲守備故也○丙申以苗胙

土爲右僉都御史巡撫南贛汀韶

故明鄖陽撫治

○丁酉刑部右侍郎提

橋引疾乞歸許之○時故明唐王僭號福建魯王竊據浙江馬士

英等兵渡錢塘去杭州城十里立五營平南大將軍貝勒勒克德

渾遣兵進勦未至馬士英兵渡江遁總督張存仁總兵官田雄追

斬五百餘級以捷聞○乙巳 太宗文皇帝次女固倫公主下嫁

察哈爾汗子阿布鼐○諭浙江總督張存仁曰各官之任時曾屢

飭以盡忠勤職毋得諂媚本王餽遺禮物爾爲封疆大吏正宜表

率僚屬恪遵訓旨乃送爾本王段二疋茶葉百斤豈前旨爾未之

聞耶今後勿復爲此○丙午以申朝紀爲右副都御史巡撫山西

由江南右
布政使遷

蕭起元爲右僉都御史巡撫浙江

由常州府知府遷

○丁未賜

故明甯南侯左良玉葬地○戊申加封和碩豫親王多鐸爲和碩

德豫親王賜從征承澤郡王碩塞貝勒尼堪博洛恭順王孔有德

懷順王耿仲明貝子屯齊和託尙善公圖賴等及外藩台吉章京

金幣○命恭順王孔有德懷順王耿仲明還盛京仍諭各屬兵秣

馬以俟調遣○公圖賴啟攝政王曰皇叔父王保輔 皇上效力

甚多難以枚舉圖賴向年效力 太宗王之所知今圖賴之心亦

猶效力於 太宗不避諸王貝勒等嫌怨見有異心不爲容隱大

臣以下牛彘章京以上亦不徇隱其過惡圖賴誓之於天必盡忠

效力圖賴少有過失王若不言我恐不免於罪戾我欲改過自新

王幸毋姑息不加教誡也○原任陝西河西道孔文譟奏臣家宗

子衍聖公孔允植已率四世子孫告之祖廟俱遵令薙髮訖但念

先聖爲典禮之宗顏曾孟三大賢並起而羽翼之其定禮之大者莫要於冠服先聖之章甫縫掖子孫世守之是以自漢暨明制度雖各有損益獨臣家服制三千年來未之有改今一旦變更恐於皇上崇儒重道之典有未備也應否蓄髮以復先世衣冠統惟聖裁得旨雍髮嚴旨違者無赦孔文諫奏求蓄髮已犯不赦之條姑念聖裔免死況孔子聖之時似此違制有玷伊祖時中之道著革職永不敘用

十一月己酉朔諭朝鮮國王李倬今中外一統四海爲家各國人民皆朕赤子務令得所以廣皇仁前有日本國人民一十三名泛舟海中飄泊至此已敕所司周給衣糧但念其父母妻子遠隔天涯深用惻惻茲命隨使臣前往朝鮮至日爾可借船轉送還鄉仍移文宣示俾該國君臣共知朕意○壬子改張存仁爲兵部右侍

東華錄

順治五

十

郎兼右副都御史總督浙江福建

由浙江總督改

以羅繡錦爲兵部右侍

郎兼右副都御史總督湖廣四川

由河南巡撫遷

○癸丑故明大學士王

應熊巡撫龍文光總兵劉鎮藩屢敗獻賊又招撫保甯都司張法

桂應熊遣其姪更律等投順賜更律等鞍馬衣帽等物○甲寅以

吳景道爲右副都御史巡撫河南

由布政使遷

○命甲喇章京巴山梅

勒章京康喀賴爲左右翼同洪承疇駐防江甯朱瑪喇駐防杭州

貝勒勒克德渾率鎮國將軍鞏阿岱固山額真葉臣討湖廣流寇

一隻虎等○丙辰以鑲紅旗護軍統領車爾布爲議政大臣○己

未禮部奏朝鮮國世子襲封查有兄終弟及之例今其國王李侗

請以次子李湔承襲相應以湔襲封遣大學士祁允格郎中朱世

起主事顧爾馬渾封李湔爲朝鮮國王世子○丁卯平南大將軍

貝勒勒克德渾等奏左翼梅勒章京朱瑪喇等敗僞總兵馬士英

於餘杭右翼梅勒章京和託等敗僞總兵方國安於富陽斬僞副將二員僞參將五員及兩翼會同回兵於杭州城三十里外突遇賊兵復大敗之後馬士英方國安渡錢塘窺杭州守杭州梅勒章京濟席哈同總督張存仁總兵田雄等擊敗之溺江死者無算○欽天監監正湯若望以修補新厯全書告成恭呈 御覽○戊辰遭左翼固山額真巴顏右翼固山額真墨爾根侍衛李國翰等率兵往陝西會同駐防西安內大臣何洛會勦四川流賊張獻忠以何洛會爲定西大將軍○山西巡撫黃徽允奏故明殉難巡撫蔡懋德當逆賊渡河知勢不能爲自縊身死總兵周遇吉日夜血戰殺賊踰萬及矢石已窮被賊磔死布政使趙建極抗節罵賊碎首刃下糧道蘭剛中矢志守城從容就義守甯道毛文炳捐身殉國鼎鑊不避巡甯道畢拱宸壯志吞賊殺身報國甯武道王允懋矢

盡礮竭城破遇害知府孫康周擊傷多賊城破盡節同知李之清
分汛調度城陷身死中路同知吳鉉竭力堵禦城破被害知縣房
之屏從容就義投井捐軀皆宜旌表以鼓忠烈下所司知之○已
巳平西王吳三桂奏臣受前朝知遇最厚因欲爲故主報讎歸命
新朝今旣矢忠於 新朝又何忍忘恩於故主恭荷 聖恩修

葺崇禎帝陵臣敬捐銀一千兩仰佐陵工更祈念臣之父母並繼

母祖氏及弟三輔俱死寇難乞從優賜卹庶臣職子心兩得自展
得旨助工銀兩照數察收應得卹典詳議具奏○山東巡按李之

奇奏薦故明大學士范復粹等三十一員因濫及貲郎切責之○

戊寅以房可壯爲刑部左侍郎由大理寺卿遷陳之龍爲右僉都御史巡

撫鳳陽由署三邊總督遷○以故明總督王永吉爲大理寺卿○以遲變

龍爲江西左布政使由山西參政遷綽繒爲河南右布政使由汝甯府知府遷

十二月己卯朔日有食之○辛巳以正藍旗滿洲費揚古爲議政大臣○乙酉招撫江南大學士洪承疇奏福建僞閣部黃道周兵寇徽州提督張天祿統兵進剿生擒僞總兵僞監紀李筦先吳志俊等陣斬賊將程嗣聖等十餘人殲賊甚眾又報故明總兵高進忠率兵三千餘人戰艦六十九艘自崇明來歸下所司議敘○辛卯江甯巡撫土國寶奏逆紳吳日生荆本徹出沒太湖倡亂連踪剽掠提督吳勝兆總兵官楊承祖等分兵追剿逆首相繼敗亡○河南巡按甯承勳奏僞兵部尙書張縉彥遁居六安州據險作梗今已就撫來歸得旨張縉彥旣投誠歸順准赴京朝見○癸巳江西總兵官金聲桓奏閩中擁立唐藩徧加僞職督臣佟養和發兵三營合臣馬步兵四路進剿遣副將李士元王得仁湯執中等攻南嶺擊敗僞閣部李永茂鄉紳楊廷麟劉同升萬元吉揭重熙及

福建之永甯王羅川王饒州之僞閩部黃道周袁州之僞總督何騰蛟等數十萬眾擒獲僞都督陳祖恩方重志余時張禮沙孟志蔡欽金世任督兵內監胡應龍○漕運總督王文奎奏海寇馬西祿王大功縛獻首賊鄧報國司邦基等並帶海船二十五隻兵丁五百餘名詣江甯投誠又如梟賊首於錫凡劉一雄等久聚江海爲總兵官孔希貴蘇見樂所擒如皋一帶悉平○丁酉以王敬錫爲浙江左布政使由糧道遷○戊戌湖廣巡撫何鳴鑾奏黃岡縣巨寇易道三王光淑擁眾猖獗連絡四十八寨總兵官徐勇領兵兩路擊之光淑就擒道三勢迫投順降者二千餘眾各寨土寇悉平○壬寅吏部議覆招撫江南大學士洪承疇奏以江甯蘇松常鎮五府隸撫臣土國寶轄池太徽甯安慶五府並廣德一州隸撫臣劉應賓轄仍兼管光固蘄廣黃德湖口等處廬鳳淮揚四府滁和徐

三州隸撫臣趙福星轄其原頒敕書俱照各分屬地方另行改正從之○癸卯攝政王多爾袞集諸王貝勒貝子公大臣等遣人傳語曰今觀諸王貝勒大臣但知諂媚於予未見有尊崇皇上者予豈能容此昔太宗升遐嗣君未立諸王貝勒大臣等率屬意於予跪請予卽尊位予曰爾等若如此言予當自刎誓死不從遂奉皇上續承大統似此危疑之時以予爲君子尙不可今乃不敬皇上而媚予予何能容自今以後可悉識之有盡忠皇上

者予用之愛之其不盡忠不敬事皇上者雖媚予予不爾宥也

溯茲鴻緒勦自太祖太宗二聖所貽之業予必力圖保護

俟皇上春秋鼎盛卽行歸政予之聲名豈渺小耶夫太宗恩

育予躬所以特異於諸子弟者蓋深信諸子之成立惟予能成立之也此意予洞知之爾等亦知之否耶且前此所以不立肅親王

者非予一人意也爾諸王大臣皆曰若立肅親王我等俱無生理因此不立乃彼時不肯議立而今則復有市恩修好者矣時諸王貝勒皆以爲然惟和碩德豫親王多鐸不答所遣大臣問曰眾人皆言惟王不出一語是何意也豫親王以爲未喻其意是以不對大臣還言以此言一出豫親王必默然無語今果如所料乃有如此之奸人耶又令大臣往悉數其事曰昔國家有喪時予在朝門坐帳房中英王豫王皆跪予前請卽尊位謂兩旗大臣屬望我等者多諸親戚皆來言之此言豈烏有耶當爾等長跪時予端坐不動曰爾等若如此予惟有一死而已曾何時見兄至而不起耶英王以爲誠然豫親王復云請卽尊位之言有之兩旗屬望我等之語未之有也大臣卽以此言入啟攝政王王又令詰之曰汝尙諱言昔日無此言耶固非出諸英王而實出諸汝也汝不曰固山額

眞阿山阿布泰在外皆謂伊等親黨屬望於予耶豫親王語塞引
罪諸王貝勒大臣以豫王妄對於理不協欲議罪攝政王以事在
赦前且予之誠諭原各令自省非欲加之罪免之○甲辰封黃河
神爲顯佑通濟金龍四大王之神運河神爲延休顯應分水龍王
之神仍命總河臣致祭○禮部彙奏終歲災異得旨災異迭見朕
衷深用兢惕爾等大小臣工俱當痛加修省盡心職業共圖消弭
毋事虛文○乙巳刑部奏致治必先明刑分理各有專屬令民間
大小事務在內不由五城御史在外不由撫按監司郡縣單詞片
紙俱向臣部告理內外各官盡成虛設今務令無藉之輩不得越
訟以滋刁風則職掌分而訟端可息得旨內外諸司各有職掌刑
部專理詳讞例不受詞古人立法原有深意以後民間詞訟在外
則歸撫按監司在內則歸順天府大宛二縣五城如果有冤抑許

赴通政使司呈請察審送部爾部不許仍前濫收詞訟如問刑衙門聽斷不公致使小民受冤者事發重治○丙午禮部奏內監仍故明例每遇朝參行禮在文武諸臣之前於體未合嗣後內監人員概不許與朝參亦不必排班伺候從之○招撫江南大學士洪承疇奏巨寇荆本徹侵據崇明總兵官李成棟統師進剿賊勢披靡崇明底定僞監軍道王臣緝向爲荆本徹威脅今大兵臨城卽開誠納款請開赦過之路以廣皇仁得旨王臣緝准與赦罪效用有功人員所司審明敘卹○祁州知州孫率禮欲劾前任知州張宏發侵盜錢糧大學士李建泰致書率禮代爲求免及率禮具本入奏通政使司李天經不卽封進率禮具告刑部勘實奏聞得旨李建泰著革職李天經降二級調用○丁未浙江總督張存仁奏叛逆方國安馬士英嘯聚江東赭山杭州朱橋范村等處所在

肆掠梅勒章京朱瑪喇總兵官田雄副將張杰等分兵進剿方國安水師數萬一鼓盡殲其餘諸逆被我軍擒斬甚眾下所司察敘○固原賊武大定作亂總兵何世元副使呂鳴夏等死之○是歲行鹽一百七十一萬六千六百二十五引徵課銀五十六萬三千七百一十兩六錢有奇鑄錢四萬四千三百七十五萬一千七百六十有奇